

REGIONAL NEWS BULLETIN

HEADLINES (MORNING)

1. Mizorama chanchin tha lo luh champha Missionary Day chu vawiin hian Kohhran ten urhsun takin an hmang.
2. Chief Minister Pu Lalduhoma hova Mizoram State Policy Coordination Committee thukhawm chuan Hand Holding pilot phase atana thawhpui tur (progress partner) chu kumin February ni 20 ah thlan fel hman ni se, an ti.
3. Prime Minister Narendra Modia chuan sawrkarin scheme a siamte zaa za tihhlawhtlin a tul thu a sawi.
4. President Draupadi Murmu chuan nimin khan rampawna khawsa India mi 27 te hnenah Pravasi Bharatiya Samman chawimawina a hlan.



MISSIONARY DAY

Mizorama chanchin tha lo luh champha Missionary Day chu vawiin hian Kohhran ten urhsun takin an hmang a.

Baptist Church Of Mizoram chuan Mizorama Chanchintha lo luh dan "Mingo Hnuhnung" tih documentary film an siam chu nizan khan hmun thum: Aizawl a Vanapa Hall, BCM Hall Lunglei leh CYLA Hall Lawngtlaiah a ruala tlangzarh a ni a. Tlangzarh naah hian tualchung kohhran atangin kal tur bik te pawh in ruat a ni.

Hetihruah hian BCM bikah Kohhran mipui nawlpui tan nizan atang khan Missionary day pual prog,hman a ni a, tukin hian BCM Hqtrs.Complex Serkawnah hun hman a ni bawk a, he hunah hian Chief Minister, Administrative Secretary PCI leh Divisional Officer,Southern Div.Salvation Army atangin thuchah ngaihthlak a ni a, Presbyterian Zaipawl leh Salvation Army Brass Band ten hun an hmang bawk ani.

Rev.Dr.R.Lalbiakliana Gen.Secy BCM hnen atangin thuchah ngaihthlak a ni a, hun hman zawhah Pu Buanga leh Sap Upa sulhnu te entheih tura phochhuah a ni ang.

BCM buatsaihin Chhun lamah inkhawmna urhsun tak hun hmangin tualchung kohhran tin ten ruaithehin Missionary Day hi lawm a ni ang a, zan lamah inkhawm banah zaikhawm a Pathian fak a ni ang.

Presbyterian Kohhran chuan, kohhran din tan ni ah hmangin, vawiin leh zan lamah kohhran tin te remchan dan angin hun an hmang ang.

(Thangmingliana Lunglei PTC)



CM

Chief Minister Pu Lalduhoma hova Mizoram State Policy Coordination Committee, CM Conference hall-a thukhawm chuan Hand Holding pilot phase atana thawhpui tur (progress partner) chu kumin February ni 20 ah thlan fel hman ni se, an ti.

Pilot phase atana thawhpui tur (progress partner) thlan kawngah Detail Project Report (DPR) neih tel zel a tul avangin hun a duh deuh tih thutkhawmah hian tarlan a ni a. CM Special package hmanga pek chhuah tur zat chu vawiin thutkhawm hian an tipung a. A tihfel nan hun tlem a la ngaih avangin line Department te chu February ni 20 hmaa an lekhate Planning Department-a thehltut fel turin an ti a ni.

Pilot Phase atana dilna hun hi khar tawh a ni a, dilna lut tawh zinga hnawl (rejected) ni lo ho zawng chu phase lo awm leh tur atana rin zui theihin line department ten an dah tha a. Thutkhawmah hian line department changtu Minister te leh Mizoram State Policy Coordination Committee member te an tel a ni.



VC ASSN

All Mizoram Village Council Association (AMVCA) in Village Council term pawh tawi chungchanga High Court-a sorkar an khinna chu Thawhtanni lo awm tur, January ni 13-ah hian High Court in a ngaihtuah dawn.

AMVCA President Pu K. Lalngaizuala chuan Akashvani corr zawhna chhangin VC term pawh tawi chungchanga sorkar an khinna chu kumina High Court hawn tan ni, Thawhtanni lo awm turah hian ngaihtuah nghal a nih dawn a ti a. Inbuatsaih ngai te an inbuatsaih that thu leh an association member, Mizoram chhunga VC member te pawh sorkar khing tura an inlungruah that thu Akashvani a hrilh a ni.

Puan tawh angin AMVCA in Gauhati High Court, Aizawl Bench-a nikum December ni 6-a sorkar khinna tur an thehluh chu sorkar atanga VC term pawhtawina order hmasa zawk, nikum November ni 20-a tihchhuah khinna tur a ni a. Sorkarin order dang, a tuk, November ni 21-a a tihchhuahin order hmasa a luahlan avangin khin theih a ni lo a, order hmasa khinna tur chu hnukdawkin order hnuhnung zawk khinna, tuna an ngaihtuah tur hi an thehluh leh a ni. Rang taka ngaihtuah dil mahse court chuan kum 2025-a High Court hawn hun, January ni 13 emaw ni 14-a ngaihtuah turin thu a lo dah tawh a ni.

Village Council term kal lai tih tawi a nih thu hi Local Administration department chuan thuchhuah siamin kumin February ni 19-ah a tawp dawn thu an lo puang tawh a. Sorkarin financial year thar lo awm tura inthlan hautak tak pali awm tur tih zangkhaia tur leh sum renchem a duh avangin Village Council term kallai chu thla 6 in a pawt tawi tih LAD Minister Pu C. Lalsawivunga chuan a lo sawi tawh a ni.

<><><>

SIAHA COURT BUILDING

Siaha District Court Building thar chu Gauhati High Court Chief Justice Shri Vijay Bisnoy a'n nimin khan a hawng.

Chief Justice chuan building thar chu a ruangam leh engkim a felin a tha hle tih a sawi a, building tha tak Siaha District in a nei thei chu lawmawm a tih thu sawiin thahnemngai taka enkawl zui zel turin chah a. Dikna in ro a relna hmun nih tir theuh turin theihtawp chhuah zel turin a fuih bawk a ni.

District Court Building, Siaha hi Centrally Sponsored Scheme niin cheng Vaibelchhe 18 senga saka ni a. Building len zawng hi square metre 4395 a ni.

(CZ Hluna Siaha PTC)

<><><>

REVENUE

Land Revenue & Settlement Minister Pu B. Lalchhanzova chuan ram teh leh felfai taka chhinchhiah hna kalpui kawnga mipuiin Revenue Department laka beiseina sang tak an neih chu tihlawhtlin a pawimawh a ti.

Nimina a hoa Land Revenue & Settlement Department in an hnathawh thlirletna hun 'LR&S Expert Conclave: One Day Review Meeting' an an hmanah Revenue Minister chuan he thu hi sawiin department-a thawktu kalkhawmte chu sulhnu felfai leh entawntlak nei tur a inzir peih leh intuaihriam reng peih mi ni turin a chah a. Minister chuan District Collector Office leh Settlement Office-te chu inhne hnai zawk a kalkawp chho zel tur a nih thu sawiin mipui tana rawngbawlina an kalpui piah lamah chhiah lakkhawm hna pawimawh tak an neih chu ngai pawimawh turin a chah a. Department thawm changtlun zel nan Champhai district pisa sakna tur cheng vbc. 4 leh nuai 68 leh Mamit district pisa sakna tur cheng vbc. 4 leh nuai 50 chu Special Assistance to States for Capital Investment (SASCI) hnuai hmu a nih thu Minister chuan a sawi bawk a ni.

LR&S Department One Day Review Meeting hi Session pathum a then niin chawhma hunah Land Revenue Administration in Mizoram, Revenue Collection- Tax & Non-Tax Revenue leh Stamps & Registration tih thupui hmangete in zirtirna buatsaih a ni a. Session pahnihnaah District tina hnathawhna kalpui dan thlirletna hun neih niin Session pathumnaah LR&S department hnathawh kaihnhawiha thupui pawimawh hrang hrang hmangin zirtirna buatsaih a ni bawk a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Wawiin chawhnu dar 2 leh a chanve-ah Chanchinthar hi puan leh a ni ang.

<><><>

TRANSPORT MINISTER

Transport Minister Pu Vanlalhlana chu Kaziranga, Assam-a 2nd Inland Waterway Development Council thuthawm ah a tel a. Assam Chief Minister Pu Himanta Biswa Sarma leh Union Minister for Ports, Shipping and Waterways Pu Sarbananda Sonowal-ten he hun hi an kaihrui a ni.

He hunah hian Transport Minister Pu Vanlalhlana chuan thusawiin, Mizoram chu tlangram a nih avanga mihring phur leh bungraw phurh luh lam ah harsatna an tawh thin thu a tarlang a. Inland Water transport changtlun tak hmangin heng harsatnate hi thui tak sutkian a nih theih tur thu a sawi a. Pu Vanlalhlana chuan Mizoramah lui lian, Inland Waterway kalpui theihna tam lo mahse a awm chhun te tangkai taka hman a nih chuan inkalpawhna kawnga harsatna leh zin mite phurrit eng emaw chen chhawk zangkhai a nih tur thu a sawi a ni.

Minister chuan Mizoramah Inland Waterway Development hnuai hma lak a nih chuan a ram leilung mi te hlawkpuina tura ruahmanna siam ngaih pawimawh ni se a duh thu a sawi a ni. Inland Water Transport subject hi Transport department kutah kum 2019 khan dah tan chauh a nih thu tarlangin Covid-19 avangin hmalakna chu engemaw chen tikhawtlai mahse a remchan dan ang angin bawhzui reng a nih thu a sawi a. Tuirial Dam chungchang tarlangin mihring leh bungrua phurh nan leh 2nd IWDC meeting-in

tihhmasawn leh tihchangtlun a tum em em, River Cruise Tourism kalpui theihna hmun pawimawh tak a nih thu a sawi.

He thutkhawmah hian Inland Waterway Authority of India (IWAI) hmalaknate tarlan a ni a. State 21 leh UT tan cheng vbc 1405 leh nuai 26 hu project hawn a ni a, chung zingah chuan Mizoram a IWT project kalpuina tur cheng Vbc. 12 leh nuai 10 a tel a. Mizorama Inland Waterway Transport project te chu IWT for River Tlawng, IWT for River Chhimtuipui leh Construction of IWT Infrastructure on Khawthlangtuipui – Tuichawng, Lunglei district-te a ni.

(DIPR)

<><><>

PM

Prime Minister Narendra Modia chuan sawrkarin scheme a siamte zaa za tihhlawhtlin a tul thu a sawi. Sumdawng hriathlawh tak Nikhil Kamatha'n a kawmnaah he thu hi sawiin Pu Modia chuan Viksit Bharat hmahlir tarlangin sawrkar scheme te chu a dawngtute hnenah zaa za thleng sela, hei hi khawtlang rorelna dik leh sakhaw zalenna nen pawha inzawm a ni a ti. Pu Modia chuan kum 2047 hma ngeiin tui, inthiarna leh kawlphehta lama harsatna te chinfel a duh thu a sawi a ni.

(Newsonair)

<><><>

PRESIDENT

President Draupadi Murmu chuan nimin khan rampawna khawsa India mi 27 te hnenah Pravasi Bharatiya Samman chawimawina a sem. Thusawiin President Murmu-i chuan rampawna khawsa India mite chuan khawvel hmuhah India nihna diktak an pholang a ni a ti. President Murmu-i chuan rampawna khawsa India mite chaun kawng tinrengah dinhmun sang tak an hauh a, heng zingah hian damdawi leh technology lamte pawh a tel a ti bawk. Nimina inkhawmah hian Union Minister-te Dr S. Jaishankar, Jual Oram, Dharmendra Pradhan, Odisha Governor Hari Babu Kambhampati, Odisha Chief Minister Mohan Charan Majhi leh mi pawimawhte an tel a ni.

(Newsonair)

<><><>

HINDI

Union Minister of State for Health and Family Welfare, Anupriya Patel chuan ram hrang hrang atangin Hindi tawng zir an pung zel a ti. Nimina New Delhi-a Vishwa Hindi Diwas a hmapuinaah he thu hi sawiin Union Minister chuan Hindi chu tawng chi khat mai niloin ram inpumkhatna siamtu a ni a ti a. Sawrkar thu pawimawh thehdarh kawngah Hindi chu tangkai taka hman a ni a ti bawk.

(Newsonair)

<><><>